

**ZAKON
O IZMJENAMA I DOPUNAMA
ZAKONA O NOTARIMA BRČKO DISTRIKTA BiH**

Na osnovu člana 23 Statuta Brčko distrikta BiH («Službeni glasnik Brčko distrikta BiH», brojevi 1/00, 4/00, 7/04, 20/05 i 24/05), Skupština Brčko distrikta BiH na 30. sjednici održanoj 26. aprila 2006. godine, usvaja

ZAKON
O IZMJENAMA I DOPUNAMA
ZAKONA O NOTARIMA BRČKO DISTRIKTA BiH

Član 1

U članu 44 Zakona o notarima Brčko distrikta BiH («Službeni glasnik Brčko distrikta BiH» broj 9/03), dodaje se stav 2 koji glasi:

«(2) Stav 1 ovog člana ne isključuje mogućnost da nacrt teksta isprave mogu sačiniti stranke ili njihovi zakonski zastupnici».

Član 2

Član 47 Zakona mijenja se i glasi:

« Pravni poslovi čiju obradu mogu obaviti notari

- (1) Pravni poslovi za čiju je pravnu valjanost neophodna notarska obrada isprava odnose se na:
1. pravne poslove o regulisanju imovinskih odnosa između bračnih drugova, kao i između lica koja žive u vanbračnoj životnoj zajednici;
 2. raspolaganje značajnim dijelovima imovine maloljetnih i poslovno nesposobnih lica;
 3. pravne poslove kojima se obećava neka radnja kao poklon, s tim što se nedostatak notarske forme u ovom slučaju nadomješta izvršenjem obećane radnje;
 4. pravne poslove, čiji je predmet prijenos ili sticanje vlasništva ili drugih stvarnih prava na nekretninama;
 5. osnivačke akte privrednih društava i utvrđivanje njihovih statuta, kao i svaku promjenu statuta.
- (2) Pravni poslovi koji, protivno stavu 1 ovog člana, nisu obrađeni kao notarske isprave, su ništavi.
- (3) Nezavisno od odredbe stava 1 ovog člana, obaveze notarske obrade isprava mogu biti predviđene i drugim zakonima.
- (4) Stranke imaju pravo da zahtijevaju notarsku obradu isprava i za druge pravne poslove, koji nisu navedeni u stavu 1 ili 3 ovog člana.
- (5) Odredbe ovog člana vrijede samo dok ne budu zamijenjene posebnim propisima o obavezi notarske obrade isprava, koji ih izričito, u cjelini ili u dijelovima, stavljaju van snage.
- (6) Pripremu akata za notarsku obradu i ovjeru isprava, kao i zastupanja stranaka pred notarima, mogu vršiti advokati.“

Član 3

Ovaj zakon stupa na snagu osmog 8. (osmog) dana od dana objavljivanja u «Službenom glasniku Brčko distrikta BiH».

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-62/06
Brčko, 26. april 2006. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić